



Da la partida ad Arosa: Robert Casanova, l'antier president chantunal da musica, Arnold Spescha, commember d'onur da l'Uniu da musica svizra, Ladina Giseb Bachmann, secretaria Uniu chantunala da musica e Peter Bieri, il president da las musicas dal chantun Berna (da san.).

FOTOS G. N. STGIER

«Musica è unitad da viver»

Uniu svizra da musica: Radunanza da delegads

DA GION NUTEGN STGIER / ANR

■ **La promoziun da la giuventetgna che fa musica resta vinavant ina incumbensa da l'uniu. Da nov è il marschar facultativ tar la Festa federala da musica. Quai è gia il cas il 2021 ad Interlaken, il lieu che segna per l'organisaziun da la festa svizra.** In di da bellezza ha dà la culissa a la 156avla radunanza da delegads da l'Uniu svizra da musica ad Arosa. Per l'organisaziun da l'occurrENZA naziunala è stada responsabla l'Uniu chantunala da musica dal Grischun cun ses president *Andy Kollegger* e commember da la direziun svizra da musica. El è sa mussà ventiraivel che l'uniu superiura svizra ha salvà la radunanza da delegads 2018 en il Grischun. La davosa giada ch'ils delegads da l'Uniu svizra da musica èn sa radunads en noss chantun è stà il 2008 e quai a Flem. Da lez temp cun *Robert Casanova* al timun dal comité d'organisaziun. En moda simpatica e cun plets cordials ha lura Kollegger beneventà ad Arosa ils 132 delegads e numerus giasts da l'entira Svizra. *Valentin Bischof*, el che stat a la testa da l'Uniu svizra da musica, ha gi grond plaschair che tantas persunas han chattà la via ad Arosa per assister a la radunanza da delegads da quest onn. In solid personal ha el drizzà als commembers d'onur da l'uniu e tar in da quels tutga er *Arnold Spescha*, il Sursilvan che hà vivi e viva anc oz per la musica instrumentala.

Nagina musica digitala

In dals numerus giasts è er stà cusseglier guvernativ *Martin Jäger*. El ha be chattà plets plaschaivels per musicantas e musicants. Lur musica saja betg musica digitala, mabain musica che vegnia fatga da carstgauns, ha punctuà il schef dal departament da cultura. La musica saja er l'expressiun da solidaritad, varietad, passiun ed unitad da viver, ha menziunà il represchentant da la regenza grischuna. *Jäger* ha ditg che la musica saja er identitad, tradiziun, cultura e societad.

Nagins cunfins linguistics

Peter Bircher, il vicemastral da la vischnanca Arosa, ha cunzunt fatg attent a l'impurtanza da las societads da musica per la cultura locala. Las uniuns da musica sajan er la percepziun da bleras vischnancas e far musica saja er ina tgra da gronda valur per la cuminanza e per las societads, ha ditg *Bircher*. Musica e notas enconuschan er nagins cunfins linguistics e la musica collia er carstgauns.

Bunamain 75 000 commembers

President da l'Uniu svizra da musica cun 32 associaziuns affiliadas e cun bunamain 75 000 commembers è *Valentin Bischof*. Er en l'avvegnir saja per l'uniu naziunala la promoziun da musicantas giuvnas e musicants giuvens la pli gronda obligaziun. Ad Arosa è er vegnì preschentà il project «las quatter stagiuns»

che duai animar mats e mattas da far musica. Da megliar las structuradas da l'uniu e da manar quella en in bun avvegnir saja in ulteriur pensum da l'uniu, ha ditg il president svizzer da las musicantas e dals musicants. Ultra da quai duai l'associaziun er en il futur avair en la varietad culturala naziunala ina gronda muntada. Da quel avis è er la nova presidenta dal cussegl naziunala da musica, cussegliera naziunala *Rosmarie Quadranti* (pbd). Ella ha ditg che la musica saja in element vital da nossa societad.

Be pli da libra voluntad

Il preschents han lura decidì ch'èn l'avvegnir dastgian commembers e commembras da la direziun da l'Uniu da musica svizra be esser pli duas giadas tschintg onns en uffizi. Fin uss n'aveva l'uniu nagin temp d'uffizi limità per las persunas che fan part dal gremium superiur da l'uniu. Da nov vegn er il president da la cumissiun da musica ad appartegnair a la direziun da l'Uniu svizra da musica. Dapi in onn tutga dal reminent er *Kollegger* a quella direziun. Decidì han ils delegads er ch'il marschar na saja en il futur tar la Festa federala da musica nagina obligaziun pli, mabain facultativ. Bleras societads da musica renunzian a la participaziun da la festa naziunala da musica er cun avair l'obligaziun da marschar.

Quatter dis in suentar l'auter

La davosa Festa federala da musica è stada il 2016 a Montreux. Dapi sonda passada è public che la proxima, la 35avla, ha lieu ad Interlaken e quai il 2021. En moda professionala han *Peter Flück*, il president dal comité d'organisaziun, ed *Iris Huggler* da la «Jungfrau World Events» preschentà il concept da basa da la festa. Interlaken saja in lieu cun gronda experientscha per organisar occurrenzas pli grondas. Uschia saja stada il 2011 la Festa naziunala da jodladers e la stad 2017 la festa da lutga «Unspunnen». Cuntrari a las davosas festas federalas da musica n'ha quella ad Interlaken en trais onns betg lieu il mais da zercladur, mabain gia il mais da matg. Nov è er che l'occurrENZA ha lieu quatter dis in suentar l'auter e na sco fin qua durant duas fins d'emna. Lieu ha la Festa federala da musica 2021 ad Interlaken dals 13 fin als 16 da matg. Ils organisaturs quintan cun passa 500 societads da musica, cun bunamain 25 000 musicantas e musicants e cun 150 000 visitaders.



Ilis trais bandierels: Kurt Roos (Musica Arosa), Teofil Mantsch (uniun dal Grischun) e René Garraud (uniun da la Svizra) (da san.).



Il president da la cumissiun da musica da l'Uniu da musica grischuna *Reto Mayer* (a san.) ed il commember da quella *Duri Janett*.



Ivan Vinzens, il Sursilvan, fa er part da la cumissiun da musica da l'Uniu chantunala da musica.



Karin Niederberger, la presidenta da l'Uniu svizra dals jodladers, cun Lucas Thöni, il president dal District da musica III.



Rosmarie Quadranti, la cussegliera naziunala, è da nov presidenta dal cussegl naziunala da musica.



En l'avvegnir n'è il marschar tar las festas federalas da musica betg pli obligatoric.